

predecesseurs contes de Flandres y avoient, quant lesdites villes, chasteaux, chastellenies, appartenances et appendances de Lille, de Douay et Dorchies estoient en leurs mains, nonobstant que nos diz predecesseurs aient acquis le demaine; et nous fera de rechief notre dit cousin de Flandres hommaige de la conte de Flandres et des dites villes, chasteaux, chastellenies de Lille, de Douay et Dorchies et des appartenances et appendances dicelles, adjoint avec le conte, a tenir en un hommaige et en pairie comme dit est, en la maniere que dairement il nous fist hommaige de ladite conte de Flandres, et notre dit cousin de Flandres nous a assure et obligie, lui, ses hoirs et successeurs, et tous les biens, terres et possessions quelxconques presens et a venir de lui et de ses hoirs et successeurs quelque part quil soient dedans notre reame, de rendre et bailler a nous et a nos diz successeurs, rois de France les diz chasteaux, villes, chastellenies, appartenances et appendances de Lille, de Douay et Dorchies, ou cas que les condicions dessus dites avenroient, que Dieux ne veille, et que on les rachateroit par la maniere dessus dite. Et quant a ce a soumis soy, ses diz hoirs et successeurs et les diz biens et terres de lui et deux, a la juridicion et contrainte de nous et de noz successeurs rois de France, et de notre court, par les quelx ses diz hoirs et successeurs seront a ce contrains et non autrement, ledit rachat premier fait par la maniere que dessus est dit; et les hoirs et successeurs de notre dit cousin de Flandres aient premier reaument et de fait la possession paisible de la dite recompense deument faite et senz fraude, et par especial se les hoirs de notre dit cousin de Flandres estoient defaillant de rendre et bailler les dites villes, chasteaux, chastellenies et appartenances de Lille, de Douay et Dorchies et des appendances quelxconques, que adont nous ou noz successeurs roys de France pourrions, sil nous plaisoit, saisir et arrester toutes leurs terres, biens et possessions dessus dites et contraindre les diz heritiers de notre cousin de Flandres par toutes voies raisonnables par notre juridicion temporelle et non autrement, afin que les dites villes, chasteaux, chastellenies, appartenances et appendances dessus dites nous fussent rendues; et ycelles rendues nous et noz diz successeurs roys de France serons tenuz en bonne foy de tantost oster et mettre au niant les diz arrez et saisines, et toutes autres empeschemens mis aux terres, biens et possessions dessus diz sens nul contredit. Et par la maniere et sur les condicions et reservacions dessus declairees, nous avons transporte et transportons en la main de notre dit cousin de Flandres et de ses hoirs et successeurs contes et contesses de Flandres pour les dessus dites dix mille livrees de terre, les villes et chasteaux, chastellenies de Lille, de Douay, et Dorchies, et toutes leurs appartenances et appendances quelxconques ainsin que ses predecesseurs contes de Flandres les tenoient ou temps quelles furent transportees es mains de noz predecesseurs roys de France, et li baillons la possession par la tradicion de ces presentes et avec ce volons et consentons expressement pour nous, nos hoirs et successeurs roys de France que toutes lettres munimens que nous avons ou pouvons avoir ou autres pour nous de notre dit cousin de Flandres ou de ses predecesseurs ou du pais de Flandres touchans en quelconque maniere que ce puist estre le transport fait a noz diz predecesseurs roys de France par ses diz predecesseurs contes de Flandres, desdiz chasteaux, villes, chastellenies de Lille, de Douay, Dorchies et des appartenances et appendances diceulx quelxconques soient nulles et de nulle valeur, et des maintenant les annullons et cassons et cognoissons et volons estre de nul effet, force et vertu, sur quelconque teneur quelles soient faites en tant comme elles peuvent ou pourroient estre ou temps avenir contraires ou prejudiciables aux choses dessus dites ou a aucune dicelles, nous ne noz diz hoirs et successeurs ne autres pour nous ne pour noz diz hoirs et succes-